




REPUBLIKA E KOSOVËS
REPUBLIKA KOSOVA – REPUBLIC OF KOSOVO

KËSHILLI GJYQËSOR I KOSOVËS No. 01, 1497
SUDSKI SAVET KOSOVA - KOSOVO JUDICIAL COUNCIL 28. 12. 2023



Këshilli Gjyqësor i Kosovës,

Në mbështetje të nenit 108 të Kushtetutës së Republikës së Kosovës, nenit 117 paragrafi 19 të Ligjit Nr.08/L-132 për Ekzekutimin e Sanksioneve Penale, si dhe nenit 30 të Rregullores Nr. 03/2020 mbi Organizimin dhe Veprimtarinë e Këshillit Gjyqësor të Kosovës, në mbledhjen e mbajtur me datë 21 dhjetor 2023,

Miraton:

**RREGULLORE Nr.12/2023
PËR PUNËN E PANELIT PËR LIRIM ME KUSHT**

**Neni 1
Qëllimi**

Kjo rregullore ka për qëllim të rregulloj procedurat për punën e Panelit për Lirim me Kusht, lidhur me shqyrtimin e kërkesave për lirim me kusht të personave të dënuar.

**Neni 2
Fushëveprimi**

Kjo rregullore zbatohet lidhur me kërkesat e parashtuara nga të dënuarit tek Institucionet Korrektuese, shqyrtimi i tyre nga Paneli për Lirim me Kusht dhe mbikëqyrjes së të liruarve me kusht nga Shërbimi Sprovues i Kosovës.

**Neni 3
Përkufizimet**

1. Shprehjet e përdorura në këtë rregullore kanë kuptimin:

- 1.1. **Ligj** - Ligji Nr. 06/L-055 për Këshillin Gjyqësor të Kosovës;
- 1.2. **KPRK** - Kodi Penal i Republikës së Kosovës;
- 1.3. **LESP** - Ligji për Ekzekutimin e Sanksioneve Penale;

- 1.4. **KDM** - Kodi i Drejtësisë për të Mitur;
 - 1.5. **Këshilli** - Këshillin Gjyqësor të Kosovës, ashtu siç përcaktohet me Ligjin për Këshillin Gjyqësor të Kosovës;
 - 1.6. **Paneli** - Paneli për Lirim me Kusht;
 - 1.7. **ShSK** – Shërbimi Sprovues i Kosovës, ashtu siç përcaktohet me Ligjin për Shërbimin Sprovues të Kosovës;
 - 1.8. **Institucioni Korrektues** – Qendrat e Paraburgimit, Qendrat Korrektuese dhe Burgu i Sigurisë së Lartë, ashtu siç përcaktohet me Ligjin për Shërbimin Korrektues të Kosovës;
 - 1.9. **Anëtarë i Panelit** – anëtari i caktuar nga Këshilli, i cili kryen detyrat dhe përgjegjësitë në pajtim me këtë rregullore;
 - 1.10. **Anëtarë rezerve i Panelit** – anëtari i caktuar nga Këshilli, i cili zëvendëson anëtarin e rregullt në rast të konfliktit të interesit apo rasteve të tjera të pengesave eventuale gjatë ushtrimit të detyrës si anëtar;
 - 1.11. **Koordinator** - koordinatori i Panelit për Lirim me Kusht i cili kryen detyrat dhe përgjegjësitë në përputhje me këtë rregullore.
2. Shprehjet e përdorura në njëjës e kanë të njëtin kuptim edhe në shumës. Fjalët e përdorura në një gjini përfshijnë edhe gjininë tjetër.

Neni 4 Përbërja e Panelit

1. Këshilli me vendim cakton anëtarët e Panelit, ashtu siç është përcaktuar me LESP. Një kopje e vendimit të Këshillit i dërgohet Ministrisë së Drejtësisë, përkatësisht Shërbimit Korrektues të Kosovës dhe ShSK.
2. Anëtari i Panelit apo zëvendësuesi i tij, i cili ka marr pjesë në shqyrtimin e çështjes penale në procedurën penale, përashtohet nga shqyrtimi i kërkesës për lirim me kusht të të dënuarit dhe zëvendësohet nga anëtari i deleguar nga kryetari i gjykatës/ministri i Drejtësisë.
3. Anëtari i Panelit kompensohet për punën e tyre në pajtim me vendimin e Këshillit.
4. Anëtari i Panelit në kryerjen e detyrave është përgjegjës për zbatimin e plotë të ligjshmërisë dhe kushtetutshmërisë, duke siguruar shkallë të lartë të integritetit të procedurës dhe vendimmarrjes.

Neni 5 Kompetencat e Panelit

1. Paneli ka kompetencë për të trajtuar të gjitha kërkesat për lirim me kusht të personave të dënuar të liruar me kusht, si dhe kërkesat tjera brenda kompetencave ligjore të Panelit, për tërë territorin e Republikës së Kosovës.

2. Paneli është kompetent për shqyrtimin e kërkesave për lirim me kusht të personave të dënuar në varësi të kushteve të përcaktuara me dispozitat në KPRK, KDM, LESP dhe akteve të miratuara në Këshill.

Neni 6 Koordinatori i Panelit

1. Paneli mbështetet nga koordinatori, i cili ofron ndihmë profesionale dhe administrative. Koordinatori duhet të ketë integritet të lartë profesional dhe moral, të ruaj fshehtësinë zyrtare dhe të veproj në pajtim me dispozitat e Ligjit për Parandalimin e Konfliktit të Interesit në Ushtrimin e Funksionit Publik.

2. Koordinatori ka për obligim në çfarëdo kohe të njoftoj kryesuesin e panelit, kur beson se mund të ekzistojë konflikti i interesit.

3. Drejtori i Përgjithshëm i Sekretariatit të Këshillit, vendos lidhur me kërkesën për përjashtimin e koordinatorit të panelit për një rast konkret, pas pranimit të kërkesës së kryesuesit të panelit.

4. Koordinatori është përgjegjës për:

- 4.1. koordinimin e aktiviteteve të panelit, në nivel të Këshillit;
- 4.2. informimin e personave të dënuar përmes Institucionit Korrektues, lidhur me zbatimin dhe trajtimin e kërkesave për lirim me kusht;
- 4.3. koordinimin e punës me Institucionet Korrektuese në lidhje me kërkesat e personave të dënuar, paraqitjen e raportit të ekipit profesionist të përcaktuara sipas nenit 116 paragrafi 6 të LESP-së si dhe nenit 15 të kësaj rregullore;
- 4.4. kontrollimi nëse raporti nga Institucioni Korrektues është i plotë;
- 4.5. koordinimin e punës me ShSK në lidhje me dosjet e personave të liruar me kusht dhe raporteve që i paraqiten panelit;
- 4.6. përgatitjen e dosjes për Gjykatën Supreme, në rastet kur paraqitet ankesë ndaj aktvendimit të panelit;
- 4.7. caktimin e kërkesave për lirim me kusht sipas tregullave të përcaktuar me këtë rregullore;
- 4.8. mbajtjen e procesverbaleve për secilën çështje në shqyrtim, bashkërendon punët me anëtarët e panelit, bën draftimin e vendimeve të panelit dhe i nënshkruan së bashku me kryesuesin e panelit;
- 4.9. dorëzimin e aktvendimeve të panelit te personi i dënuar përmes Institucionit Korrektues;
- 4.10. dorëzimin e aktvendimeve aprovuese të panelit te Departamenti i Evidencës Qendrore Penale në Sekretariatin e Këshillit, për regjistrimin e të dhënave në Sistemin Qendror të Evidencës Penale;
- 4.11. dorëzimin e aktvendimeve revokuese të panelit në Departamentin e Evidencës Qendrore Penale në Sekretariatin e Këshillit, për regjistrim në sistemin qendror të evidencës penale;
- 4.12. mbledhjen e informacioneve dhe përpilimin e statistikave mbi të gjitha aktivitetet që lidhen me lirimin me kusht duke siguruar mbrojtjen e të dhënave;

- 4.13. përgatitë raporte periodike dhe vjetore mbi organizimin dhe funksionimin e punës së Panelit si dhe të aktivitetave që lidhen me lirimin me kusht të personave të dënuar;
- 4.14. kujdeset për mirëmbajtjen dhe përdorimin e vulës të pranimit dhe vërtetimit, dhe librat e protokollit, ku evidentohen të gjitha kërkesat për lirim me kusht, raportet nga ShSK dhe të gjitha parashtresat e tjera;
- 4.15. hartimin e kërkesave buxhetore dhe shpenzimet e tjera të panelit, në bashkëpunim me përgjegjësin e financave të Këshillit.

Neni 7
Afati për shqyrtimin e kërkesave

Paneli shqyrton kërkesat për lirim me kusht të personave të dënuar jo më vonë se dy (2) muaj, nga data e pranimit të kërkesës për lirim me kusht. Ky afat mund të zgjatet edhe për një (1) muaj, duke dhënë arsyen e vendimin e marr nga paneli për zgjatjen e këtij afati.

Neni 8
Caktimi i kërkesave për shqyrtim

1. Koordinatori pas kontrollimit të dosjes cakton datën e seancës ku do të shqyrtohet kërkesa sipas renditjes së tyre në bazë të datës së pranimit nga Institucioni Korrektues. Personi i dënuar përmes Institucionit Korrektues njoftohet për datën kur do shqyrtohet kërkesa e tij.
2. Paneli shqyrton brenda një seance së paku dhjetë (10) deri në pesëmbëdhjetë (15) kërkesa.
3. Përashtimisht nga paragrafi 2 i këtij neni, numri maksimum i kërkesave për shqyrtim mund të ndryshoj, në rastin e kërkesës së shtyrë për shqyrtim nga seanca e kaluar.

Neni 9
Kushtet për lirim me kusht

1. Lirimi me kusht mund të kërkohet vetëm kur aktgjykimi ndaj personit të dënuar është i formës së prerë.
2. Kur një person i dënuar ka disa dënimë me burgim, kërkesa e tij mund të parashistrohet vetëm pasi që të bëhet unifikimi i këtyre dënimive dhe të shqiptohet një dënim unik me burgim.
3. Kërkesa për lirim me kusht bëhet e pranueshme nga ana e panelit kur plotësohet kushti i paraparë me KPRK dhe KDM për lirimin me kusht, dhe atë:
 - 3.1. personi i dënuar për veprën penale për të cilën është paraparë dënim me të paktën pesë (5) vjet burgim, mund të lirohet me kusht pasi të ketë mbajtur dy të tretat (2/3) e dënimit të shqiptuar. Për vepra tjera penale, personi i dënuar mund të lirohet me kusht pasi të ketë mbajtur gjysmën e dënimit të shqiptuar;
 - 3.2. personi i dënuar me burgim të përjetshëm mund të lirohet me kusht pasi të ketë mbajtur

tridhjetë (30) vjet nga dënim i burgim i shqiptuar. Periudha minimale e mbikëqyrjes nga ana e ShSK do të jetë së paku pesë (5) vjet;

- 3.3. personi i dënuar me burgim për të mitur, mund të lirohet me kusht pasi të ketë mbajtur një e tretën (1/3) e dënimit.

Neni 10 **Qëllimi i lirimit me kusht**

1. Lirimi me kusht është një procedurë ligjore që synon të ofrojë një mundësi për personat e dënuar të cilët plotësojnë kushtet për lirim me kusht në përputhje me legjislacionin penal të Republikës së Kosovës.

2. Lirimi me kusht si procedurë ligjore synon të arrijë qëllimet e mëposhtme:

- 2.1. zvogëlimin e efekteve negative të burgosjes për personat e dënuar;
- 2.2. parandalimin e kryerjes së veprave penale, duke ofruar mundësinë për rehabilitim dhe ri-integrim të personit të dënuar në shoqëri;
- 2.3. përgatitjen për ri-integrim me qëllim që personi i dënuar ta menaxhojë jetën e tij në një mënyrë të përgjegjshme, shoqërore, dhe pa ra ndesh me ligjin pas lirimit;
- 2.4. mbrojtjen e shoqërisë duke ndihmuar në parandalimin e kryerjes së veprave penale të mëtejshme.

3. Paneli me rastin e trajtimit të kërkesave për lirim me kusht i kushton vëmendje veçanërisht të dënuarit të gjykuar me dënim afatgjatë, gratë e burgosura dhe të miturit me qëllim të zvogëlimit të efekteve negative të burgosjes, duke zbatuar standartet dhe instrumentet ndërkombëtare.

Neni 11 **Rrethanat që ndikojnë në lirimin me kusht**

1. Paneli gjatë shqyrtimit të kërkesës për lirim me kusht do t'i vlerësoj rrethanat si në vijim:

- 1.1. përshkrimin e personit të dënuar për veprën penale, gjendjen fizike dhe psikike të tij;
- 1.2. qëndrimin e personit të dënuar ndaj viktimës;
- 1.3. sjelljen e mirë gjatë burgimit, përkatësisht të dhënat nëse është shqiptuar masë disiplinore ndaj tij gjatë vuajtjes së dënimit;
- 1.4. rrethanat e tij familjare dhe të kaluarën shoqërore;
- 1.5. planet e të dënuarit pas lirimit;
- 1.6. pranimi i kontrollit dhe mbikëqyrjes nga ShSK;
- 1.7. ekzistanca e një rreziku të përgjithshëm për shoqërinë/komunitetin;
- 1.8. programet rehabilituese të ndjekura nga personi i dënuar;
- 1.9. vlerësimi i progresit të arritur te i dënuari në planin individual të rehabilitimit;
- 1.10. rrethanat e tjerë të vlerësuara nga paneli që tregojnë se i njëjti nuk do të kryej vepër penale.

Neni 12 **Informimi mbi procedurat e aplikimit për lirim me kusht**

1. Në çdo kohë pas fillimit të ekzekutimit të dënimit, personi i dënuar njoftohet nga zyrtarët e Institucionit Korrektues për:

- 1.1. të drejtat, kushtet dhe procedurat që lidhen me lirimin me kusht;
- 1.2. datën në të cilën person i dënuar e arrin 1/3, 1/2 ose 2/3 e dënimit, varësisht se cilin kusht duhet ta plotësoj ose në rastet e dënimit me burgim të përjetshëm, datën kur arrin tridhjetë (30) vite të dënimit.

2. Tridhjetë (30) ditë para se një kërkesë e pranueshme t'i përcjellët panelit, drejtori i Institucionit Korrektues do t'i japë personit të dënuar një njoftim me shkrim se i njëjtë kualifikohet për lirim me kusht dhe në rast se jep pëlqimin, do t'i paraqitet kërkesa për lirim me kusht nga ana e Institucionit.

Neni 13 **Fillimi i procedurës**

1. Personi i dënuar njoftohet mbi kualifikueshmërinë e tij dhe për të drejtën e tij për të paraqitur një deklaratë me shkrim duke përdoruar shtojcën 1, e cila është pjesë përbërëse e kësaj rregullore.

2. Personi i dënuar e parashtron me shkrim kërkesën për lirim me kusht përmes Institucionit Korrektues, ku është në vuajtje të dënimit me burgim.

3. Personi i dënuar merr një fletëkthesë nga drejtori i Institucionit Korrektues ku shënohet data e paraqitjes së kërkesës për lirim me kusht, e cila kërkesë i përcjellët panelit.

4. Në çdo kohë anëtarët e familjes dhe personat e autorizuar mund të paraqesin kërkesë/lutje me shkrim lidhur me lirimin me kusht tek drejtor i Institucionit Korrektues apo panelit që mund të përbaj ndonjë të dhënë shtesë që nuk e përmban kërkesa e drejtuar nga Institucioni Korrektues.

Neni 14 **Deklarata e të dënuarit për lirim me kusht**

1. Personi i dënuar ka mundësi të paraqesë një deklaratë me shkrim, ku i paraqet arsyet e parashtrimit të kërkesës për lirim me kusht. Në rast se i dënuari nuk mundet që vetë të shkruaj kërkesën, Institucioni Korrektues do t'i ofroj ndihmë.

2. Në këtë deklaratë i dënuari do të paraqet këndvështrimin e tij për veprën ose veprat penale për të cilat është dënuar, faktin se vuajtja e dënimit ka pasur ndikim dhe ndryshimin që ka shkaktuar në jetën e tij dhe të paraqet planet konkrete për të ardhmen.

3. Kjo deklaratë me shkrim i dorëzohet drejtorit të Institucionit Korrektues brenda shtatë (7) ditëve nga kërkesa për lirim me kusht. Një deklaratë jashtë këtij afatit nuk mund të konsiderohet e papranueshme.

Neni 15 **Parashtrimi i dosjes në panel**

1. Shtatë (7) ditë para se një person i dënuar kualifikohet për lirim me kusht ose në rast kur ka arritur kualifikimin më herët se ky afat, kërkesa dhe dosja personale e të dënuarit e përgatitur nga Institucioni Korrektues i përcjellët Koordinatorit të Panelit nga drejtori i Institucionit Korrektues.

2. Dosja e personit të dënuar duhet të përmbaj raportin përbledhës të përcaktuar në nenin 116 paragrafi 6 të LESP, si dhe dokumentet si në vijim:

- 2.1. aktgjykimin e formës së prerë me të cilin i është shqiptuar dënimimi me burgim, në rast se çështja penale është shqyrtuar nga gjykata të niveleve të ndryshme duhet t'i përmbaj të gjitha aktgjykimet;
- 2.2. raporti i detajuar lidhur me dënimet e mëparshme;
- 2.3. fletë informacioni me të dhënat kryesore në lidhje me personin e dënuar për t'u plotësuar nga zyrtari ligjor apo drejtori i Institucionit Korrektues;
- 2.4. raporti i punonjësve sociale të Institucionit Korrektues;
- 2.5. raporti i stafit mjekësor;
- 2.6. raport nga zyrtarët korrektues, që përfshinë një përbledhje apo histori të incidenteve të personit të dënuar;
- 2.7. deklarata me shkrim e personit të dënuar;
- 2.8. raporti mbi trajnimet dhe aftësimin profesional të vijuar nga ana e personit të dënuar në rast se ka vijuar;
- 2.9. çdo dokument shtesë nga ana e të dënuarit, anëtarëve të familjes së tij dhe personat e autorizuar, që e mbështesin lirimin me kusht apo që përban informata relevante lidhur me lirimin me kusht;
- 2.10. të dhëna nga shqyrtimi paraprak i kërkesës së të dënuarit nga paneli, përfshirë numrin e aktvendimit të panelit, datën dhe mënyrën e vendosjes.

3. Drejtori i Institucionit Korrektues kujdeset që dosja e dërguar panelit t'i përmbaj të gjitha të dhënat sipas paragrafit 2 të këtij nenit, si dhe raportin përbledhës të nenit 116 paragrafi 6 të LESP.

4. Në rast se dosja konsiderohet që nuk i përbanë të gjitha të dhënat, Paneli mund të kërkoj nga Institucioni Korrektues që të plotësoj me të dhënat që mungojnë, por në rast se edhe pas kërkesës nuk arrihet të sigurohen këto të dhëna, Paneli mund të vendos për atë kërkesë nëse konsiderohen se ka të dhëna të mjaftueshme.

Neni 16
Nënshkrimi i marrëveshjes për mbikëqyrje

Drejtor i Institucionit Korrektues ku personi i dënuar është duke vuajtur dënimin, do të ftojë një zyrtar të ShSK të rajonit përkatës për ta intervistuar personin e dënuar. Gjatë kësaj interviste i kërkohet të dënuarit që të nënshkruaj një premtim, që nuk do të kryej një vepër tjetër penale gjatë periudhës së lirimit me kusht.

Neni 17
Konflikti i interesit dhe përjashtimi

1. Kryesuesi i panelit apo anëtarët nuk duhet të marrin pjesë në shqyrtimin e një kërkesë për lirim me kusht dhe përjashtohen nga ushtrimi i funksionit në çështjen e caktuar në rastin kur:

- 1.1. është dëmtuar me vepër penale;
- 1.2. është bashkëshort, bashkëshort jashtëmartesor, person në afri gjinie në vijë të drejtpërdrejtë të çfarëdo shkalle ose në vijë të tërthortë deri në shkallën e katërt, person në afri krushqie deri në shkallën e dytë me të pandehurin, mbrojtësin e tij, paditësin, të dëmtuarin, përfaqësuesin e tij ligor ose përfaqësuesin e autorizuar;
- 1.3. është kujdestar ligor, nën kujdestari ligjore, i adoptuar ose adoptues i të pandehurit, mbrojtësit të tij, prokurorit të shtetit ose të dëmtuarit të tij;
- 1.4. në çështjen e njëjtë penale ka marr pjesë në procedurë si gjyqtar, prokuror, mbrojtës, i dëmtuar, përfaqësues ligor apo i autorizuar i të dëmtuarit ose është pyetur si dëshmitar apo ekspert;
- 1.5. ekziston konflikt i interesit, siç përcaktohet në nenin 6 të Ligjit nr. 06/L-011 për Parandalimin e Konfliktit të Interesit në Ushtrimin e Funksionit Publik.

2. Kryesuesi apo anëtar i panelit nuk do të përjashtohet, kur ka qenë vetëm i përfshirë në procedurën e mëparshme paraprake në të njëjtën çështje penale, si një anëtar i panelit shqyrtues.

3. Kryesuesi apo anëtar i panelit përjashtohet nga procedura e shqyrtimit për lirim me kusht edhe në rast se ekzistojnë rrethana që e vejnë në dyshim paanshmërinë e tij.

4. Për përjashtimin e anëtarëve vendos kryesuesi i panelit, ndërsa për përjashtimin e kryesuesit të panelit vendos kryesuesi i Këshillit. Kryesuesi apo anëtar i cili përjashtohet zëvendësohet me zëvendësin e tij.

Neni 18
Referimi i çështjes

Kryesuesi i panelit duke u bazuar në dosjen dhe të dhënat shtesë që mund të ketë një kërkesë për lirim me kusht bën referimin e çështjes për anëtarët e panelit, në seancën në të cilën bëhet shqyrtimi i kërkesës.

Neni 19
Zhvillimi i seancës, këshillimi dhe votimi

1. Shqyrtimi i kërkesës fillon me referimin e rastit nga kryesuesi i panelit, anëtarët e panelit mund të konsultohen me dosjen e rastit, nëse e konsiderojnë të nevojshme një gjë të tillë.
2. Pas referimit të rastit dhe konsultimeve të nevojshme, anëtarët shprehin mendimin e tyre përmes votimit, kryesuesi i panelit voton i fundit.
3. Vendimet merren me shumicë votash, nuk lejohet abstenimi. Procesi i votimit mbahet në seancë të mbyllur dhe me praninë e anëtarëve vendimmarrës dhe koordinatorit.
4. Në seancë mbahet procesverbal në të cilin shënohet data dhe vendi i mbajtjes së seancës, anëtarët e Panelit, të dhënat e rastit, vendimi i marrë dhe mënyra e votimit. Prosesverbal i nënshkruhet nga të gjithë anëtarët dhe koordinatori i Panelit.
5. Në rastet kur kemi një kërkesë urgjente dhe për shkaqe të arsyeshme nuk mund të mbahet seanca me prezencë fizike të anëtarëve të panelit, atëherë e njëjtë pas dërgimit të dosjes dhe shkresave përcjellëse nga koordinatori te anëtarët e panelit, të njëjtit mund të deklarohen përmes komunikimit elektronik lidhur me mënyrën e vendosjes.

Neni 20
Vendimmarrja e Panelit

1. Paneli në lidhje me kërkesën për lirim me kusht të personit të dënuar vendos me aktvendim.
2. Paneli gjatë shqyrtimit të kërkesës për lirim me kusht të personit të dënuar mund të vendos:
 - 2.1. të aprovoj kërkesën për lirim me kusht;
 - 2.2. të refuzoj kërkesën për lirim me kusht;
 - 2.3. të hedh poshtë kërkesën për lirim me kusht, dhe;
 - 2.4. të pushoj procedurën e shqyrtimit të kërkesës për lirim me kusht.
3. Paneli mund ta shtyj një kërkesë për shqyrtim nëse e konsideron se nevojiten ende informacione ose në mungesë të njërit nga anëtarët e Panelit, duke e konstatuar në procesverbal. Shtyrja bëhet derisa të sigurohet informacioni ose prezenca e anëtarit, por jo të kaloj afati dy (2) mujor i paraparë për shqyrtimin e kërkesës për lirim me kusht. Për shtyrijen e kërkesës për shqyrtim, njoftohet personi i dënuar përmes Institucionit Korrektues.

Neni 21
Përbajtja e aktvendimit

1. Aktvendimi i panelit përmban:
 - 1.1. hyrja e aktvendimit përfshinë: emrin dhe mbiemrin e kryesuesit dhe anëtarëve të

Panelit dhe të koordinatorit, emrin dhe mbiemrin e të dënuarit, datën e parashtrimit të kërkesës për lirim me kusht, veprën penale për të cilën është dënuar, llojin e dënimit të shqiptuar dhe gjykatën e cila e ka shqiptuar atë, data dhe vendi i mbajtjes së seancës;

- 1.2. dispozitivi i aktvendimit përfshinë: mënyrën e vendosjes dhe të dhënat personale të personit të dënuar, duke përfshirë edhe numrin personal të personit të dënuar;
- 1.3. arsyetim të mjaftueshëm, me detajet faktike që ndikojnë në vendim, qofshin ato pozitive apo negative;
- 1.4. këshillën juridike.

2. Vendimi i nxjerr nga paneli nënshkruhet nga kryesuesi dhe koordinatori i panelit.

Neni 22 **Dorëzimi i aktvendimit**

- 1. Aktvendimi i dorëzohet personit të dënuar brenda tre (3) ditëve, nga dita e marrjes së tij përmes Institucionit Korrektues.
- 2. Aktvendimi aprovues i panelit së bashku me dosjen e të liruarit me kusht, duhet t'i dorëzohet ShSK brenda afatit tre (3) ditor, pas marrjes së vendimit për lirim me kusht, në mënyrë fizike apo elektronike.
- 3. Një kopje e aktvendimit aprovues i dorëzohet Departamentit të Evidencës Qendrore Penale në Sekretariatin e Këshillit, për regjistrim në Sistemin Qendorr të Evidencës Penale.
- 4. Aktvendimet e panelit për të cilat nuk lejohet ankesa, marrin formën e prerë në datën e mbajtjes së seancës për shqyrtim të kërkesës.

Neni 23 **Përbajta e vendimit aprovues**

- 1. Aktvendimi me të cilin aprovohet kërkesa për lirim me kusht, përfshinë datën e lirimit me kusht dhe datën e përfundimit të dënimit. Data e lirimit me kusht duhet të jetë brenda afatit një (1) favor nga dita e shqyrtimit të kërkesës.
- 2. Ky vendim duhet t'i shërbej ShSK në mbikëqyrjen e personit të liruar dhe orientimin e saktë në lidhje me kontrollin dhe asistencën e tij.
- 3. Ky vendim duhet të përbajë gjithashtu edhe të dhënat e mëposhtme:
 - 3.1. personi që është liruar me kusht informohet me faktin se lirimi me kusht mund të revokohet dhe në disa raste duhet të revokohet, nëse i liruari me kusht, kryen një apo më shumë vepra penale derisa është në lirim me kusht;
 - 3.2. i liruari me kusht është i detyruar që të informojë Policinë dhe ShSK brenda pesë (5) ditëve, nga data e lirimit për vendbanimin e tij gjatë periudhës së lirimit me kusht;
 - 3.3. i liruari me kusht është i detyruar që të raportoj tek ShSK gjatë periudhës së lirimit me kusht.

kusht;

- 3.4. nëse personi i liruar me kusht ndryshon vendbanimin, ai është i detyruar të informojë Policinë dhe ShSK;
- 3.5. nëse personi i liruar me kusht dështon të informojë apo raportojë, siç u përcaktua në pikën 3.4 të këtij neni, paneli mund të revokojë vendimin për lirim me kusht;
- 3.6. i liruari me kusht nuk mund të udhëtoj jashtë shtetit të Republikës së Kosovës, pa një aprosim paraprak të panelit.

Neni 24 **Shkeljet disiplinore**

1. Nëse personit të dënuar i shqiptohet masa disiplinore e vetmisë ndërmjet datës së marrjes së aktvendimit për lirim me kusht dhe datës së lirimit me kusht nga mbajtja e dënimit, paneli e rishqyrton aktvendimin.
2. Institucioni Korrektues e njofton me shkrim panelin, për shkeljen disiplinore.

Neni 25 **Procedura para lirimit**

1. Institucioni Korrektues ndërmerr veprimet si më poshtë, kur personit të dënuar i aprovohet lirim me kusht:
 - 1.1. njofton gjykatën që e ka dërguar për ekzekutim dënimin me burgim, të paktën njëzet e katër (24) orë para fillimit të lirimit me kusht, duke përdorur formularin e komunikimit të lirimit me kusht (Shtoje 2), pjesë përbërëse e kësaj rregullore;
 - 1.2. njofton Drejtoren e Rajonale të Policisë së Kosovës të asaj zone, në të cilën personi i liruar do të banojë gjatë periudhës së lirimit me kusht, të paktën njëzet e katër (24) orë para fillimit të lirimit me kusht duke përdorur formularin e komunikimit të lirimit me kusht (Shtoje 3), pjesë përbërëse e kësaj rregullore;
 - 1.3. njofton qendrën më të afërt rajonale të ShSK, duke përdorur formularin e komunikimit të lirimit me kusht (Shtoje 4), pjesë përbërëse e kësaj rregullore;
 - 1.4. ia shpjegon personit të dënuar plotësisht kushtet e lirimit.

Neni 26 **Mbikëqyrja e personave të liruar me kusht**

1. ShSK e njofton panelin me raport përkatës, për fillimin dhe ecurinë e mbikëqyrjes së personit të liruar me kusht.
2. ShSK është i obliguar që të njoftoj panelin, në afat prej pesëmbëdhjetë (15) ditë pune, pasi personi i dënuar të jetë liruar me kusht.

3. Në rast të ndryshimit të vendqëndrimit, i liruari me kusht obligohet të informoj ShSK dhe Policinë e Kosovës për vendqëndrimin e ri dhe arsyet e ndryshimit. ShSK e njofton panelin për ndryshimin e vendqëndrimit.
4. ShSK raporton çdo vit për zbatimin e programeve për të liruarit me kusht dhe ecurinë e mbikëqyrjes, si dhe në fund të afatit të kushteve të shqiptuara për lirimin me kusht dhe në rastet kur paraqitet ndonjë vështirësi në mbikëqyrje.
5. Paneli në çdo kohë mund të kërkoj nga ShSK që të raportoj për ndonjë çështje të caktuar që lidhet me personin e liruar me kusht.
6. Përfundimi i suksesshëm i periudhës së mbikëqyrjes i raportohet panelit nga ShSK, me një raport përfundimtar.

Neni 27 **Revokimi i lirimit me kusht**

1. Nëse ShSK has në vështirësi në mbikëqyrjen e personit të liruar me kusht, për arsy se i njëjtë nuk e informon për ndryshimin e vendqëndrimit apo nuk lajmërohet në zyrat e ShSK, dhe humb kontaktin me të, Paneli mund ta revokojë lirimin me kusht në bazë të propozimit të ShSK, në pajtim me nenin 119 paragrafi 4 të LESP.
2. Paneli mund të revokoj aktvendimin edhe në rast se personi i liruar me kusht refuzon të mbikëqyret nga ShSK.
3. Nëse lirimi me kusht revokohet, personi i dënuar mban pjesën e mbetur të dënimit.
4. Në rast se brenda njëzet e katër (24) orëve, pas dorëzimit të aktvendimit me shkrim për revokimin e lirimi me kusht, personi i liruar me kusht nuk kthehet vullnetarisht në mbajtje të dënimit, Policia e Kosovës me forcë e sjellë personin e liruar me kusht në Institucionin Korrektues për mbajtjen e pjesës së mbetur të dënimit.
5. Në rast se personi i liruar me kusht nuk gjendet në territorin e Kosovës, pa aprovimin paraprak të panelit, atëherë me urdhër të panelit, drejtoria rajonale e ShSK kërkon nga Policia e Kosovës që të lëshohet letër rreshtim ndërkombëtar.
6. Nga një kopje e aktvendimit revokues i dorëzohet Departamentit të Evidencës Qendrore Penale në Sekretariatin e Këshillit, për regjistrim në Sistemin Qendror të Evidencës Penale.

Neni 28 **E drejta e rishqyrtimit**

1. Nëse kërkesa për lirim me kusht refuzohet, aktvendimi mes tjerash përfshin datën kur paneli mund të rishqyrtoj kërkesën e personit të dënuar për lirim me kusht. Data për rishqyrtim nuk mund të jetë më e shkurtë se tre (3) muaj dhe jo më e gjatë se dymbëdhjetë (12) muaj.

2. I dënuari që ka mbetje të dënimit më pak se tre (3) muaj, dhe nuk plotëson kushtet për lirim me kusht, të njëjtë mund t'i refuzohet kërkesa për lirim me kusht, pa të drejtë rishqyrtimi.

Neni 29
E drejta në ankesë

1. Pala e pakënaqur me vendimin e panelit, ka të drejtë të ankohet ndaj vendimeve, drejtpërdrejtë në Gjykatën Supreme, brenda pesëmbëdhjetë (15) ditëve nga dita e pranimit të vendimit.
2. Në rastin e refuzimit të kërkesës për lirim me kusht nga gjashtë (6) muaj e tutje, pala e pakënaqur nuk ka të drejtë ankesë ndaj vendimit të panelit.

Neni 30
Rishqyrtimi i kërkesës

1. Aktvendimi me të cilën i është refuzuar kërkesa për lirim me kusht i dorëzohet të dënuarit përmes Institucionit Korrektues.
2. Institucioni Korrektues ia dërgon kërkesën për rishqyrtim Panelit shtatë (7) ditë para arritjes së kohës për rishqyrtim.
3. Dosja e kërkesës për rishqyrtim përditësohet nga ana e institucionit duke u bazuar në nenin 116 paragraf 6 të LESP dhe nenit 15 të kësaj rregullore. Përditësimi i raporteve do të bëhet për periudhën nga data e refuzimit deri në datën e dorëzimit të kërkesës për rishqyrtim.
4. Kërkesa për lirim me kusht, e parashtruar për rishqyrtim bëhet sipas procedurës së përshkruar në këtë rregullore.

Neni 31
Dosjet e kërkesave për lirim me kusht

Të gjitha dosjet e kërkesave të shqyrtuar nga paneli, ruhen dhe sistemohen në zyrën e panelit, dhe pas kalimit të një periudhë varësisht nga ngarkesa në zyrë, dosjet më të vjetra arkivohen në arkivin e Këshillit, ndërsa asgjësimi i tyre mund të bëhet në pajtim me rregullat e përcaktuara nga Këshilli dhe legjislacioni në fuqi.

Neni 32
Trajnimi

Anëtarët dhe koordinatori i panelit gjatë një vitit ndjekin të paktën një (1) trajnim që ka të bëj me lirimin me kusht me theks të veçantë në psikologji, kriminologji, psikiatri, pedagogji, sociologji dhe për aspektet procedurale të shqyrtimit të kërkesave.

Neni 33
Publikimi dhe mediat

1. Të gjitha informacionet lidhur me personat e dënuar, të cilët aplikojnë për lirim me kusht, apo u nënshtrohen procedurave të shqyrtimit për lirim me kusht janë konfidenciale dhe nuk zbulohen, apo nuk bëhen të njohura për opinion apo mediat.
2. Përjashtimisht, kryesuesi i panelit, mund t'i bëjë të njohura informacionet konfidenciale për mediat ose grupet e tjera të informimit publik, nëse dhënia e këtyre informacioneve është në pajtim me interesin e përgjithshëm shoqëror.
3. Informacionet e tillë konfidenciale nuk zbulohen, nëse zbulimi i tyre paraqet rrezik për sigurinë e Institucionit, i cili nxjerr vendimin mbi lirimin apo edhe për rendin dhe sigurinë e përgjithshëm të institucioneve korrektuese dhe nëse dhënia e këtyre informatave mund të dëmtojë qëllimin e dënimit.
4. Aktvendimet e panelit të përpunuara sipas Ligjit për Mbrojtjen e të Dhënave Personale, publikohen në faqen zyrtare të Këshillit.
5. Një kopje e kësaj rregullore vendoset në çdo Institucion Korrektues ku mund të kenë qasje personat e dënuar, dhe po ashtu me kërkesën e tyre mund t'i dorëzohet personalisht një kopje e rregullores nga Institucioni Korrektues.

Neni 34
Dispozitat kalimtare

Të gjitha kërkesat e parashtruara për lirim me kusht të pranuara deri në hyrje në fuqi të kësaj rregullore, shqyrtohen me Rregulloren mbi Organizimin dhe Funksionimin e Panelit për Lirim me Kusht, Nr. 01/39.

Neni 35
Dispozitat shfuqizuese

Me hyrjen në fuqi të kësaj rregullore, shfuqizohet Rregullorja mbi Organizmin dhe Funksionimin e Panelit për Lirim me Kusht, Nr.01/39 e datës 22 shkurt 2012, si dhe të gjitha dispozitat e akteve të miratuar nga Këshilli, që bien në kundërshtim me këtë rregullore.

Neni 36
Shtojcat


1. Pjesë e kësaj rregullore janë shtojcat:

- 1.1. Shtoja 1: Njoftim për personin e dënuar mbi kualifikueshmërinë e tij për lirim me kusht;

- 1.2. Shtojca 2: Formular i komunikimit të lirimit me kusht me gjykatën që ka dërguar për ekzekutim dënimin me burgim;
- 1.3. Shtojca 3: Formular i komunikimit të lirimit me kusht me Drejtorinë Rajonale të Policisë së Kosovës të asaj zone, në të cilën personi i liruar me kusht ka vendqëndrimin e tij;
- 1.4. Shtojca 4: Formulari i komunikimit të lirimit me kusht me Drejtorinë Rajonale të Shërbimit Sprovues të Kosovës të asaj zone, në të cilën personi i liruar me kusht ka vendqëndrimin e tij.

Neni 37
Hyrja në fuqi

Kjo rregullore hyn në fuqi në ditën e miratimit të saj nga Këshilli Gjyqësor i Kosovës.



Albert ZOGAJ,

Kryesues i Këshillit Gjyqësor të Kosovës,

Datë: 28. 12. 2023



Republika e Kosovës

Republika Kosova-Republic of Kosovo

Qeveria -Vlada-Government

Ministria e Drejtësisë-Ministarstvo Pravde-Ministry of Justice

Shërbimi Korrektues i Kosovës/Korektivna Služba Kosova/Kosovo Correctional Service

SHTOJCA 1: Njoftim për personin e dënuar mbi kualifikueshmërinë e tij për lirim me kusht.

DATË:	
REFERENCË:	
PËR:	
PËRMES:	
NGA:	
KOPJE:	
LËNDA:	KUALIFIKIMI PËR SHQYRTIM PËR LIRIM ME KUSHT

I/E nderuar,

Sipas ligjit të aplikueshëm, ju bëjmë me dije se me datë _____ kualifikoheni për t'u shqyrtuar për lirim me kusht nga ana e Panelit për Lirim me Kusht.

Ju keni të drejtë të paraqisni një deklaratë me shkrim në lidhje me kualifikimin tuaj për lirim me kusht, e cila do të merret parasysh nga ana e Panelit gjatë shqyrtimit të kërkesës tuaj. Nëse vendosni të jepni një deklaratë, ju lutem të keni parasysh disa faktorë që Paneli mund të marrë parasysh gjatë shqyrtimit të kërkesës si qëndrimin tuaj ndaj veprës penale, raportin me viktimen/palën e dëmtuar, sjelljen gjatë vuajtjes së dënimit dhe planet tuaja pas lirimit me kusht.

Nëse vendosni të ushtroni këtë të drejtë, është e këshillueshme që ju ta paraqisni deklaratën tuaj me shkrim tek Drejtori i Institucionit Korrektues brenda shtatë (7) ditëve nga marrja e këtij njoftimi.

Nënshkrimi i marrësit: _____

Data: _____._____._____



Republika e Kosovës
Republika Kosova-Republic of Kosovo
Qeveria -Vlada-Government

Ministria e Drejtësisë-Ministarstvo Pravde-Ministry of Justice

Shërbimi Korrektues i Kosovës/Korektivna Služba Kosova/Kosovo Correctional Service

SHTOJCA 2: Formular i komunikimit të lirimit me kusht me gjykatën që ka dërguar për ekzekutim dënimin me burgim.

DATË:	
REFERENCË:	
PËR:	Kryetarin e Gjykatës Themelore _____
PËRMES:	
NGA:	
KOPJE:	
LËNDA:	

I/E nderuar,

Ju njoftojmë se Paneli për Lirim me Kusht me aktvendimin _____, të datës _____, ka aprovuar kërkesën e të dënuarit _____ për lirim me kusht.

Në aktvendim të Panelit për Lirim me Kusht, për të dënuarin _____, data e lirimit të dënuarit është _____, ndërsa data e përfundimit të dënitit të personit të dënuar është me datë _____.

Personi i dënuar, tani i liruar me kusht është njoftuar se lirimi me kusht mund të revokohet nëse kryen vepër penale gjatë periudhës së lirimit me kusht.

Njoftimi para lirimit me kusht të personit të dënuar ju përcjellët në pajtim me nenin 128 të Ligjit Nr. 08/L-132 për Ekzekutimin e Sanksioneve Penale dhe nenin 25 paragrafi 1, nën paragrafi 1.1 të Rregullores Nr. 12/2023 për Punën e Panelit për Lirim me Kusht.



Republika e Kosovës

Republika Kosova-Republic of Kosovo

Qeveria - Vlada - Government

Ministria e Drejtësisë-Ministarstvo Pravde-Ministry of Justice

Shërbimi Korrektues i Kosovës / Korektivna Služba Kosova / Kosovo Correctional Service

SHTOJCA 3: Formular i komunikimit të lirimit me kusht me Drejtorinë Rajonale të Policisë së Kosovës të asaj zone, në të cilën personi i liruar me kusht ka vendqëndrimin e tij.

DATË:	
REFERENCË:	
PËR:	Drejtorinë Rajonale në _____ Policia e Kosovës
PËRMES:	
NGA:	
KOPJE:	
LËNDA:	

I/E underuar,

Ju njoftojmë se Paneli për Lirim me Kusht me aktvendimin _____, të datës _____, ka aprovuar kërkesën e të dënuarit _____ për lirim me kusht.

Në aktvendim të Panelit për Lirim me Kusht, për të dënuarin _____, data e lirimit
të dënuarit është _____, ndërsa data e përfundimit të dënimit të personit të dënuar
është me datë _____.

Personi i dënuar, tani i liruar me kusht është njoftuar për obligimin e tij/saj se brenda pesë (5) ditëve nga data e lirimt nga burgu të njoftojë Policinë e Kosovës për vendqëndrimin e tij gjatë periudhës së lirimt me kusht dhe në rast se ndërron vendqëndrimin të informoj Policinë dhe Shërbimin Sprovues. Po ashtu, nëse personi i dënuar nuk përmbush obligimet, Paneli për Lirim me Kusht mund ta revokoi vendimin për lirim me kusht me propozim të Shërbimit Sprovues.

Njoftimi para lirimit me kusht të personit të dënuar ju përcjellët në pajtim me nenin 128 të Ligjit Nr. 08/L-132 për Ekzekutimin e Sanksioneve Penale dhe nenin 25 paragrafi 1, nën paragrafi 1.2 të Rregullores Nr. 12/2023 për Punën e Panelit për Lirim me Kusht.



Republika e Kosovës
Republika Kosova-Republic of Kosovo
Qeveria -Vlada-Government
Ministria e Drejtësisë-Ministarstvo Pravde-Ministry of Justice
Shërbimi Korrektues i Kosovës/Korektivna Služba Kosova/Kosovo Correctional Service

SHTOJCA 4: Formulari i komunikimit të lirimit me kusht me Drejtorinë Rajonale të Shërbimit Sprovues të Kosovës të asaj zone, në të cilën personi i liruar me kusht ka vendqëndrimin e tij.

DATË:	
REFERENCË:	
PËR:	Drejtorinë Rajonale në _____ Shërbimi Sprovues i Kosovës
PËRMES:	
NGA:	
KOPJE:	
LËNDA:	

I/E nderuar,

Ju njoftojmë se Paneli për Lirim me Kusht me aktvendimin _____, të datës _____, ka aprovuar kërkesën e të dënuarit _____ për lirim me kusht.

Në aktvendim të Panelit për Lirim me Kusht, për të dënuarin _____, data e lirimit të dënuarit është _____, ndërsa data e përfundimit të dënimit të personit të dënuar është me datë _____.

Personi i dënuar, tani i liruar me kusht është njoftuar se brenda pesë (5) ditëve nga data e lirimit nga burgu të lajmërohet në Drejtorinë Rajonale të Shërbimit Sprovues të Kosovës dhe obligimin që gjatë periudhës së lirimit me kusht të raportoj në Shërbim Sprovues.

Njoftimi para lirimit me kusht të personit të dënuar ju përcjellët në pajtim me nenin 128 të Ligjit Nr. 08/L-132 për Ekzekutimin e Sanksioneve Penale dhe nenin 25 paragrafi 1, nën paragrafi 1.3 të Rregullores Nr. 12/2023 për Punën e Panelit për Lirim me Kusht.